

太

函

集

太函集卷之一百四

新都汪道昆伯玉著

書牘三十三首

許相公

不佞道昆越在草莽何敢與朝廷之議干威福之  
權第吾鄉故有任事之臣功浮於罪時蒙世祖見  
察迄今未白其寃此亦相公之所習知鄉黨之所深  
隱者也第威福自天子出無敢躡嚅而吐一辭幸  
而政府直道贊襄虛心容納無幽不闡無枉不伸凡  
諸疆事未修躬行無缺藉令在辟猶追錄之蓋將以

惟蓋勸忠以瑕疵棄過者也當胡少保在事東南岌岌乎殆哉彼其以五餌餌夷以五間間夷成則上功否則無赦一反手耳于時事由中制政以賄成少保內不顧身家外不顧毀譽上不避刑戮下不避猜疑如將以糜費結納而繩墨之固多小過卒之敵如就糜墨如受梟蕩平底績遺東南數千里之安是曰愚忠其愚不可及也 太上廣厲臣工無論存歿二三元府操其衡石至公至明鄉人寧詎以月旦之私借資九鼎第匹夫匹婦猶能止雨飛霜況 世祖之力臣寧即湮滅此者東南不歲九原尚亦有望乎哉自

嘉靖以來吳越則屬少保百粵則屬司徒八閩亦嘗  
屬之不佞皆新都產也猶之四坐具在酌者乃行巨  
觥皆曰不勝惟新都能耳既舉既醕則又曰夫夫醉  
矣將安用此酒徒少保之功獨優其受法尤烈不佞  
有懷骯髒敢哆口而一申之總兵戚繼光卒以貧灰  
卹典不及聞之 廟議未定其何以勸方來倘有擇  
于芻蕘似亦礪世磨鈍一道也惟相公體之亮之蓋  
之容之

又

不佞重聽滋甚驛書至悉不聞比來聚訟盈庭越俎

代割退寸進尺直言滋多部議率持兩端猥自以爲  
得體甚則或中一螯堅爲石人也者以當之律以三  
揖一辭何栖栖也自相公入政府于茲七年圭田不  
足丞嘗居第不容旋馬齋用不逮中賈服御不異儒  
生間有強宗食指萬計一變至道率以禮讓相先本  
之躬行靡然顧化制節謹度取取足師顧獨有善稱  
人逡逡自下周旋揖讓無智名無勇功一闥八荒莫  
非度內則相公其人乎邇聞謬以散木爲材直將舉  
之櫟社一二知己喁喁和之先是不佞私布鄙衷自  
絕于世久矣夫匠石不顧固難倍繩墨以千斧斤無

寧自褻其尊自貶其重耳不佞以口代耳居然不聰  
非直邑里知之即邦域知之審矣自今願相公尊重  
慎毋強聒而扞成心比歲洊饑八口幸無菜色郡大  
夫寬平易直民以不冤縣大夫孳孳救荒不遺餘力  
饗賜多矣不佞且爲境內謝之

徐少司馬

戎車三駕成萬世功李帥自蜀徵辭不佞何所逃避  
第岷峨河漢攀躋可即厲揭可窮不佞以一拳一勺  
之多寧詎能揚扈萬分之一也入春聞得賜告不亦  
急流勇退乎哉功而不伐上遂其高善始善終千古

一遇不佞竊方之六月息耳扶搖九萬背負青天寓  
內日望之矣不然則鳥盡弓藏似非所以待方召也  
有道之世固當如是邪秋杪薄寒蜀道更宜調護不  
佞將從陽鳥逆之衡陽不具述

王弼州

歲內啓事已具發使再行勸勦相乘三發三寢歲事  
更始倏再浹辰將携季息入成均先是詹尹以公裏  
言相告故尔猶豫黃公瓚奉尺一至諄諄然欲推之  
輓之林下一老禿翁放之長林豐州亦可自適其適  
矣寧復能易麋鹿之性被周公之法服乎哉家弟痼

疾纏綿阿嘉亦嚶吐噓二仲一寒如此承公憫念及  
之婁江之行萬不容已俟其小愈而後決策次公集  
已成否倘得公所爲狀願效區區建本之議云何  
海內望此久矣藉令南宗伯人居四輔願公爲高  
廟夷夔瑯琊太原二郎君竝以舉首與計偕赤幟誰  
牽第一越在艸莽日幾幾望之不腆附申然一失而  
再舉矣

又

使者將命自婁江敢不唯唯適家弟病甚旬日不粒  
食而不饑亟歸里中臨視之日恃米飲人參湯各二



杯耳然邪氣猶在或得少延倘藉寵靈雖加一日愈  
於已使者主於索文報命姑越信宿籌之先師出大  
家竊計諸通家兄弟猶然饒溢翁晉翩翩佳公子也  
一寒如此哉丁元父已行境內莫爲地主二三君子  
臭味差池未同而言夫夫所赧第值凶歲八口磬磬  
扉屢不供無所逃罪翁晉事公爲父執而尊公若神  
明即不能望仲宣而公之汲引不啻中郎上矣茲圖  
一嚙矢而復入公其念之

又

當世斯文下不在山林上不在臺閣嘗聞長公有是

言矣第爲山林處守卒以陸沉長公方提北斗朝南  
都登臺閣自今始弟即丘園自廢束帛不入兩都吾  
道大行帖帖私喜以桃李投報之義專力布庭猥云  
未將殊不成享林卧不睹驛書久矣長君除目早晚  
若何邇聞不讀中秘書悉受嚴君之指此老氏所以  
遠殆辱也世德其猶龍乎

又

使者稽程奄及兩月大半爲阿淹病甚兼以行部應  
接里社過從手誦長公實錄萬言一舉三廢略則已  
蹙詳則已舒蹙則失真舒則失體拮据挾日之半殊

不成章亦知政府秩宗有辭庶足以增高馬鬣不佞  
無所用于椎鑿第將爲七尺災次公諸公子以重幣  
加遺不敢聞命封識未發附使璧歸歲杪大事可襄  
已屬阿嘉會葬餘在副簡

又

邇從南中知厚者聞長公用力於所不能舉用情於  
所不及知弟則何人得當葑菲蓋千古一遇矣弟衰  
年重聽即不避推轂塗枳不前借曰厚顏胡爲乎復  
玷白簡自今願置之齒頰之外匿我瑕疵即蓬萊方  
丈未必能從長公游乃若相待于黃山白岳之間或

相求于三江五湖之上幸有餘力矣所不由衷者司  
盟棄之孟竒爲南海珠胎固當徑寸始至未及相見  
近始傾心其言嚶嚶大而有當公覲非其敵也長公  
固自辨之頃從余納言閨次公冢君之變名家主器  
胡遽至是哉長公通在衰麻不啻失手足之戚古人  
中年憂傷之懼幸善自寬茲與龍君御胥命嚴陵埃  
仲嘉歸屬之携季兒入監計當嗣布不盡願言

又

比歲不聰得老函中爲幸箕山推轂本自弇山不佞  
業已爲嵇康力謝之矣卽聞箕山即主波及函中此

函中以薄德累箕山箕山亦以輕口自累要皆以牛馬應之耳身隱焉用名哉十月襄事有期湖上之盟不果春二月將期公于吳江此時携季兒入南雍可幸一執手所不入婁江者避人言也程生行附此布復方遣季女而競兒再舉一孫人事倉皇不及覲縷

王大司馬

不才樗朽天幸曲全屏跡幽源歷有年所比來二三耆舊或以爲芘乘也者而物色之推輓歌呼明公首倡藉令不倍繩墨寧避斧斤顧榮外枵中寸無所用大匠弃而不顧安所取材重以司聽不聰第施施以

口代耳即掛一職而非忝也猥云重聽無妨乎昔山  
公有意乎嵇生卒從其志生才百倍不佞不佞何敢  
望生要以生之不堪事或同耳備在莫逆明公先得  
我心不佞敢私布之毋令憤憤復落多口

陳少司空

嘉隆之際浮慕直言諸輕俊自恃雌黃目中無復長  
老明公獨持禮法不避賢豪允矣綱紀之臣于茲一  
覲不佞備在夙昔聞此而喜可知乃若陟三臺遷九  
列則明公分內事何暇游談不佞一病十年因而廢  
聽業已自絕當世幸得墮戶以終餘年故竿牘不入

都門恐憎不理之口茲復見坐將焉避之懼任耳者  
未獲我心貽辱知己屬從弟以公役赴部私布一言

邵中丞

頃爲兒曹通名函書特達猥蒙折節不啻通家齟齬  
鰕生何以任此茲承專使將命不佞方以逮事爲榮  
重辱匪頒互見迭出闌及衰白其將爲鵜鶘乎殷相  
公故在同門夙昔莫逆後與江陵夾輔彼有他腸不  
佞心直濟南無能爲彼諍友卒之尊名重典乃在琬  
琰之間天不憖遺斬焉血食中書君以使事入歛自  
負不羈今能輯遺草以待取材庶幾乎能子矣褒然

首簡惡取不馴之詞第儼然如面命之何敢辭避聞  
翁得代已命北轅使人日夕喁喁毋令愆期獲罪適  
敦葬事再信始竣窮索疾書徒跽鉛槧法駕自郢都  
始發願一運斤而滅之行且中立臺端爲社稷紀綱  
之後三旌八座跬步五升不佞家食以來竿牘不入  
都門久矣不腆陳賀願附歸使將之

龍君御

東甌書至知渥洼復產神駒比年以來僅爲宰公一  
開口而笑入冬未得除目其如嚴瀨之期何拓落一  
官無論淹速第累年契闊惟聚首爲皇皇此心想同



之也聞長君自四明入甌海樂在墳簞赤水來書亟  
稱仙才濟美宰公固星精也猥云有父兄在不復求  
仙邪不佞方外之遊近得蠡測徒以死生猶之晝夜  
無寧規規然避一死乎阿淹八月伏床旬日不粒迄  
今少愈猶能作字稱詩阿嘉久困新豐歲杪始作歸  
計競兒乳臭已涉書淫異日作一腐儒庶幾擇地而  
履者也頌言勒石神人咸歸一老禿翁疇能適主新  
詩在簞琅琅風生特裊美過精良不可任小冊得詩  
九首附介士歸吳生稼塋先師霽寰先生季子也獨  
持風雅代起東藩王長公折節下之直將登之武林

之上生慕宰公殊久附上二章自晉謫居者流日以  
詩酒爲事詩則吾家事也特患不工藉令右儀狄而  
左揚雲非計之得也不佞自慚故態乃今願爲骨鯁  
之臣計宰公蓋之容之不任惶悚

又

至後嚴疑視比年特甚江流濺濺如斷髮永且腹堅  
榜人逆別駕公舟膠于麥灘之上舳艫銜尾不能進  
擁塞下流蕪之蹊行枳不容踝水陸俱阻此時舟師  
當入嚴瀨如失期何月望薄錢塘猶故轄也且舉室  
載道省會似不可留聞武林望吳門必鑿永乃可進

茲專力馳告胥命者三聞自虎林過四明計往來非  
再挾日不可倘簡書勿亟行可徐徐正月下旬期于  
陽羨或夫容寺或玉女潭兒曹蓋欲卜居不佞相去  
差近此其一也餘艤或難逗遛願以京口爲期三詔  
洞中五年再至又一奇也如經白下謁京地公則又  
期於栖霞彼中香積可飯矣升中頌已塌百本未及  
裝潢獻歲當藉手獻之耳仲淹不能從陸無任獻歎  
仲嘉留滯淮陽歲杪始得息趺季兒春入冑監恐不  
及樞衣東面嚮往

屠緯真

張龍陽見客得足下數十百言精進之功駸駸將入  
聖域由信心直心深心且生無所住心矣上之太夫  
人康寧舒泰其適可知僕自惟鈍根惡能控拳穿草  
兼之異人絕跡無所師承前擁格則猶觸藩後追驅  
則猶入肆役人之役不釋鑽研足下所云立敝者不  
佞其人也龍門聲迹相及重以臭味相同振落廣文  
時作鄭老故態室遠心邇愛莫助之彭令君誠心直  
道然簡略自任無能結客驩龍陽留滯招提竟以垂  
橐去白榆集羨長七月遣使賁來則與繕書人王鳳  
川俱業已錄將竟梓人亦吳人也梓二卷畢歲寒且

歸獻歲之春乃可畢事承示補陀志不佞與家弟各有詩他日附錄不次

李本寧

僕以四月八日入關迄于八月始出里中視家弟疾月之旣望重使將命至肇林貺如丘山言如肺腑竊惟不令兄弟衰朽支離不足以當世人白眼太史公謬爲折節閔焉視弱弟而兄之北面大梁愧非夷門役也往將爲太翁立傳負諾責者七年面與阿淹商之須留二使因之呈草太母聖善之紀姑竢後圖二使懼報命愆期亟求速發彊而後留之矣僕適當大

功反服兼遣季女屆期自輦林歸太函病矣蕪之謝  
客既久出則蟻附如羶既閱挾旬不暇一操不律于  
時郡縣故有期而遞舉宴會難以禮辭竊計加以挾  
旬尚未可必二使亦病其一不敢復稽謹陳感悰併  
謝不敏郡大夫董公遇僕有加禮自云於太史公爲  
通家季女以九月十九日醮之自後乃可從事二草  
具將徼惠二千石發一急足奏之大梁不腆錢錢百  
不報一病中不能搜索主臣主臣

韓直指

道昆幸託宇下謬承特達之知存問先施專使申命

蓋將逮以文事使之張皇國典揚扈家聲皇皇以  
有事爲榮何論辱命使者歸報業已私布感悰薄寒  
中人病肺爲歎濡遲旬日始得具草若干言極知不  
馴寧蟻祠事僅追諾責庶幾毋坐愆期臺門森嚴敬  
白二千石藉郵書專達弋鵠得驚有覩如何獻歲道  
出虎林當負荆以謝東望暎日神與之俱肅狀無長  
語

陳玉叔

頃走一介起居悉屏不腆顧塵溫辭相報有如面談  
近與龍君御胥命嚴陵作十日布衣飲黯然而別不

遑奉書已屬通名致意嚮往驛傳廷尉之使至誠如  
所聞自方伯視之則已淹自內史視之則差速耳于  
時不遺草莽貺命先加汲汲之謂何不佞非其任也  
南中計與王長公朝夕出入真平生驩入秋携季子  
入成均或得爲郊關之客蓋待舍弟仲嘉未至故遲  
遲耳六石銘有諾責謹稽使者補之竊欲勒之石而  
附之銘懼無能一當不朽率爾私布不任主臣

劉督學

不佞三仕楚數服膺於楚之良君侯自姑孰讞新都  
大有造於宇下于時姚公令歛廖公令祁閭以三良



顯其後雲杜徐公出守武陵龍公相之既而丁令君  
居海陽彭令君居歙此惟天授其皆得楚乎哉第君  
侯拓落浮沉莫決其故兼之雲杜不起武陵量移即  
比翼圖南三戶居間左矣要以碑之道路之口杓之  
俎豆之司去後之思永永無射乃今廖使君在事不  
啻決江漢以渥部中又一時也比年諸弟子無似得  
齒通家不佞一疾十年蒲伏終老不自意得當宿昔  
從使君所得拜問遺離索幾二十年旦暮神遇一霑  
濡沫旣圉圉而復洋洋惠以溫辭加于厚幣無量已  
譜序之役敢不祇承二監依人嘔血復作聞命先輸

唯唯俟來月具藁上之

汪郡丞

自蕪湖遣問知運木京師久之閱仕籍知足下業已  
專城再閱則漢中之名易矣問之績溪廖文學文煥  
云足下固無恙似仍在蜀中三閱而蜀中虛無名又  
不得其故適門人黃應達自蜀至乃知足下以安邊  
丞馬湖此出當路推轂無疑蓋彼中息兵必擇人善  
其後耳極知忠信可行蠻貊足下且優爲之要之文  
翁無讓潁川武侯鼎足而分迄今以萬世爲土足下  
居常自負固知不薄居夷願言勉之此千秋尸祝之

業也僕老矣比年幸強健第曷不聰乃今日不覽驛書耳不聞時事口不佔俾足不登臨若長生若無生悉置勿講第熙熙待盡庶幾乎天游異日足下名遂功成願從我肇林以脩夙約襄陽故業似不當以傳子孫或於此擇善地一區亦歸根反本之所爲務也

蕭宣州

頃紹介宛陵誠自知其不恪明公無所噍責蓋之容之內省終不自寧迄今猶有慙色將命者至則溫辭爲厚幣先不佞不勝主臣避席而拜其辱備在夙昔其何敢辭丁戌之間鄭使君守宛徐使君守新都竝

以楚之良千里相照乃今新都得黃府主宛得明公  
千里一時龔黃接壤不佞沐咸池而晞髮重以決沃  
焦而波及之即張楚無能庶幾依楚自張矣國子先  
生龍君御翩翩楚材顧出入不矜一蹶而失千里不  
佞不避忠告諄諄以苦口進之頰首而從庶幾折節  
既自武林北上任放自如不佞人微言輕愛莫爲助  
今在函丈願太史公脩以繩墨之言宛陵有兩生一  
曰守箕一曰鼎祚皆博學好古足破天荒儻然物色  
之亦吳公之賈生也兒曹以母多病未及橋門獻歲  
當行或假榜人餘力使旋布謝不盡願言

周國雍

家食食貧歲五不稔杪秋畢嫁衰疾交侵遑事五游  
僅依特室而已方生倅至跼然振西來音一發五函  
三讀什襲即劍門采阻庶幾乎一括見之殆將爲化  
人爲希有爲師利爲普門無論馬卿子雲非其人矣  
當世務骨鯁爲名高率謂虛文無益二三耆舊弁山  
先鳴雲土代興六翮已具不謂卑棲艸莽而南海隩  
區西川荒服乃下鵷雛僕則萑苻殊非竹箭無庸傾  
蓋驩若平生是蓋得之聲氣之先索之形骸之外千  
古一遇不亦知希足貴乎哉僕知慮不逮王孫將圖

不朽於梁木使君直以旃檀爲麗誓將肉骨而生之  
藉令有胷無心猶知銜結燕兩之惠亦既登嘉要之  
則蠶叢非高灝瀕非深操蛇之神業已鞭之東下太  
函一魁父耳其何敢承家弟支離既廢且篤茲謀之  
弁山雲土將爲僕勒一家言獻歲方授梓人秋可畢  
事僕蒞三鎮卒閱六師奏議僅數十章亦附劄劄于  
時肺病大作不克先陳副封云左氏書方倂左投之  
林宗所旣發始知其牴牾異日者將索之荊州倘不  
以九仞絕人僕願榜其棹楔西陲多事拊髀思將將  
才驛聞羌復生心計填蜀非使君不可竢拜旃檀之

至紹介嗣陳婚氏行肅此先達不具

程雲南

大婚近矣太親家宅兆之上云何親家持重如千鈞目攝不佞則以爲迂爲佻爲怪誕爲紛更之四者不佞誠有之固宜其言不入昔之諫鼓謗木寧能盡保其不迂不佻不怪誕不紛更擇一善則從之于是乎迂者圓佻者捷怪誕者經而核紛更者協于時宜如其不然將安用此昔周文至德武周用殊繼述不同同歸達孝牧野之事豈規規然遵治命哉二姓兒女婚姻不啻肺腑關弓之泣不于他人而于其兄第母

操成心毋弱成事此非惟郎君可轉爲福即長君亦大有賴焉

焦弱侯

自昔舉公車第一人莫不歆艷 聖明禮遇優渥名器特隆稽古之榮于斯爲至顧自鄙人耳目所及三歲代興或職論思或贊密勿下之不負所學上之不負所知其人斌斌殆可僂指要以究極本原獨覩昭曠僅得公一人誠知大行不加得之自是海內喁喁望治必得若而人以希太平鄙人聞之喜而不寐畢司理祝海陽及郡中二三子遞至拜命之辱三復申



之鄙人宿諾有年主臣無任盖自焦山歸歛不令兄弟  
疾疾相仍鄙人猶幸苟延重聽滋甚舍弟既廢且篤保  
之不啻嬰兒以故諾責不脩則潘懋德方伯雨習知之  
矣索居偃蹇竿牘不入都門屬門人方于魯北游肅狀  
以謝不敏自今力疾從事計府僚當入賀謹具藁附之行

李觀察

從許丞拜君侯問遺之辱由前盖至于再至于三不  
佞方在唾餘人所不齒君侯求舊於宇下津津然聲  
歎及之久要不忘亦猶之古道也方今鹽梅在宮府

骨鯁在臺垣封疆之臣林林乎方召在事矣頃推轂者率先君侯蓋秉輿論之公一舉而得社稷之衛不佞聞之溢喜固知螻屈必伸第彼中市不可遽罷戰不可必有功兵不可俛強食不可卒辦自中制者且耽耽督責之杞人之憂計無所出計君侯石畫具在日可見之行矣來書尚爲不佞扼腕不佞何敢與聞許丞豎子還閩倉卒私布不盡

夏陳州

不佞三仕楚既去而楚君子未嘗絕之故不佞不避未同之言亦各有所當也君侯之舉鄉國不佞越在

鄖關後二年而入朝又三年而歸養屏居州莽僅從仕版得君侯姓名近屬父黨起家幸得爲州倅倅資滋薄又幸得君侯爲依歸且曰衡石群材嚴于月旦即不佞無似間一咳唾及之不佞自託神交非未同之赧赧也適家墮往省安否輒附只尺通名門人方士枝爲舍弟婚氏操儒術而受賈業曾得及公門乎其未邪回向中原喁喁嚮往不腆之贄先以未將鑒存幸甚

王行父

當代楚材滋盛臨臯下雉先鳴足下代興得父師而

速肖舉世沾沾拾瀋獨食沆瀣而引清冷直將吞七  
澤漱三湘即岷嶓難爲源滄溟難爲委矣頃自弇州  
即世天喪斯文獨楚師出郢鄂之間分左右廣其右  
即太史楨也足下以輕車進驂兩服而連衡寧詎楚  
之良乎陳其參則皆天下士也從郝生受尺一空谷  
得跽然之音其義愈高其辭愈下其所養可知矣聞  
下雉出弇州于時僕亦將發屬弱弟病甚竟未成  
行玉叔欲脩袂金陵業已無及聞張助甫且至僕請  
更九日爲期時當賓興足下能待吾黨否屬葉已畢  
授梓計先秋可訖工儻然幸覩白門願以爲贊顧衰

門敝帚將不免見笑於大方家西面喁喁尚胥嗣布

新野王

貺命三及新都其何以追諾責即無能爲役寧復遲  
遲一表二詩草草塞白即不能揚扈萬一庶幾不失  
孝子慈孫之心李太史越在大梁天下士也集中僅  
得其一詩耳何可無文他如四明屠隆句吳徐桂吳  
江俞策蘭谿胡應麟孝豐吳稼登盡東南之美中原  
則君侯爲政願設天網以該之重問頻仍無以爲報  
對使稽首無任主臣

密藏上人

凡夫末技微若雕蟲上人以法語命之將謂鷦鷯亦具佛性雷門一奮敢不響應乎哉叔宗久阻津行不遑報命比年南宗不競浸入榛蕪上人親轉法輪不啻西來龍象凡夫奄奄暮矣安得遶坐投地一禮希有乎哉此中游饑于時無能效力俟歲事稍入將率二三長者子佐若干函叔宗陸歸無可爲獻茲具淨餅一具淨巾四幅附丁南羽一葦將之

呂調甫

往受命爲太君傳迄今悒悒主臣天不憖遺賓我元老東南地維缺矣奚翅泰山梁木乎哉長公復以立

傳命之謫陋無能爲役第以感恩不若知已不佞寧  
敢負相公之知矧長公歷叙周詳有如良史風神色  
澤具在丹青三事名公事不遺而文省矣不佞拙工  
也壹以公所稱載爲準繩累三千言曾不足以揚竈  
萬一間多慙直不避譙呵長公自述一篇先登彼岸  
西方妙覺於是乎圓不佞欣爲奉巾挈瓶蓋亦聲聞  
衆也溽暑用事稽使者東歸適校敝集以授梓人日  
不暇給且老妻驟病浹辰始平罪在濡遲敬謝不敏  
使者將命貺若丘山懼坐不共拜嘉有覲此中結白  
榆社司封幸而同盟近著視昔猶賢即壽世父文亦

神足也聞西湖增勝一切改觀八月潮生願乘木東  
下儻然遇合平原布衣何勝焉謹先布訂之

陳婺源

宇下諸生將命至則修成言不佞幸得習大司空即  
光祿君亦嘗締通家之好重以君侯之命紹介且專  
以有事爲榮敢不自效丘山之貺其何敢承先是盛  
同年二三父母將爲大宗伯王公壽且書抵不佞徵  
辭君侯列名其間申以司理公之意方從事于此必  
畢事而後受工諸生還肅此報命大司空奏疏秩宗  
序之竊意併入集中方爲全帙恐光祿君或未寄至



裒爲另集亦可山城毒暑願爲柱石加食涼風生當  
踐三洞之約不具

范原易

驛聞足下彈事令人勃勃生氣而壯之夫以當職之  
事繩執法之臣當宁當其言大司馬持其是卒之  
從量移而引避之此非俊鶻一擊而決九天平歸來  
固當作里社游翺翔方外何至不蟄而瑾不氷而凝  
過矣過矣頃過海陽已從諸長老言之猥承尺一先  
施篚幣具在僕事足下惟謹然不能爲非禮之恭幣  
出無名即不恭不避矣新詩滿帙雅量高致于此概

見之歸使不留草草布謝

胡伯安

嗣君辱在里社則長者以貺命命之無施不隆無辭不腆亦惟惠顧通家之好託以神交德意烝烝先施無倦重以君夫人窀穸之事逮及芻蕘即有曾無心知厚知重嗣君謬相膠漆留滯六旬平生之游不久于此不令兄弟卑卑甚矣抑何脩得此哉嗣君博學宏辭當世無兩以長者爲之父若天縱之不急近功不操拘論恣其獨往冥搜千古旁及百家藉令高時著作之廷首出文學侍從之列猶之鱗火寧詎能與

日月爭光邪是年敦杖國中將從嗣君爲長者壽適  
榜人遠在江滸歸則愆期且弱弟之病滋深不無狼  
顧嗣君先發附布區區極目赤松神與俱往願言不  
盡

太函集卷之一百四

太函集卷之一百五

新都汪道昆伯玉著

書牘三十三首

許相公

頃從家監得相府書重問兼至戀戀故人之意猶然  
不忘不佞自任恣睢夙嬰衆惡相公不任耳視洞然  
以察爲明睨者求多其爲圭璧之玷咎將誰歸第自  
不佞終喪遽然忘世即從輦下推轂未諒不佞之  
心彼狎狎也者直以爲選蠕而力排之信乎知我者  
希矣天喪元美後死者謂何丘里之言業已付之剞

剔非故加灾于木逝將獻笑于大方梓人事竣即當  
畢謝鉛槧雖從擊壤不容贊一辭邊事紛紛任公子  
大有造於不佞斯其以怨樹德敢不中藏郡邑守令  
皆良饗執政之賜弘多矣縣大夫且內召郡大夫當  
上程書願乞如二大夫者若而人保我境內即老窮  
巷不亦由由乎哉比年拓相舍者三願以次完繕彼  
其垣屋不治儉安足師是歲雨暘及時農事庶幾有  
穫居中燮理繫于柱石之身願舒几几坦便便爲社  
稷蒼生福不腆另狀餘無附言

焦太史

別駕還郡得太史公書朝市山林萬里如聞聲歎歲  
五不稔民其無如今茲雨暘及時有秋可待自不佞  
家食誓將以藜藿終焉皮相舉肥闌及擁腫睨者弗  
察輒以爲有心也者而剗刃焉頃之邊事紛紛斯其  
大有造于不佞不佞猶故吾也其何敢忘山中每接  
驛書慙憂饒于溢喜 君相明賢良矣大臣法矣爭  
臣直矣顧發言盈庭不啻聚訟此何繇至哉杞人過  
憂願太史公釋之也自昔有道之士目詞賦而雕蟲  
公不其然則亦以爲經國大業後之來者誰其代與  
文王周公孔子之文文之聖也惟公揭白日于懸寓

庶幾耳目一新石刻四種獻笑大方幸而引之繩墨  
分封使節何事未遑謹請命

龍君御

承惠書無示諫草起而距踊不自知其若狂屬吳雲  
將行草草具書私布溢喜繼聞國子先生有代興者  
亦將留中太學賢士之關非虛語矣近屬汪宗孝赴  
函丈肅此申之宗孝雅在門牆宰公期之進取北游  
就試幸得后夔氏爲之依歸凡可孚而化翼而飛無  
庸緩頰宰公故有新都之約計將入郎署能作校士  
一行乎太函方治門垣異日者建千秋閣徙白榆社

于此詭集凡六十筴業已屬金陵梓人入秋訖工將求刪定不腆布縷之幣願當暑御之

又

自君侯之辟雍書四五上公遠至習聞起居往往以禮法納忠而君侯不羈猶故也公遠耳語乃得裏言但博一省郎即撮一丸泥塞武陵谿口審如是不亦翩翩乎豪舉哉宜其聞不佞言直蠅蚊耳竊以君侯非曲士非偏才得志則大行不得志則龍蛇宜無不可藉令爲龍蛇也者寧能雷奮而終蟄邪必如不佞衰白之年雷收聲矣知有夜水而已季兒無競欲遣



之橋門則以舐犢之私不欲寘之太遠茲已赴金陵  
矣舍弟道會將彈鋏都市中入夏始成行計入秋乃  
可息趼道貫幸無恙然病日深不佞坐此不能爲白  
下遊仍作函中踣躅耳公遠北上不佞方爲季兒治  
裝僅以尺一相通不遑布幣平生屬草業已屬劉生  
部署之

寄李本寧

天喪斯文弇州即世鄙人糟食之餘苦耳避道傍而  
下無蹊攫者猶然及之是不若速朽之爲愈也惟公  
碩果久因積薪吾黨率以文窮其操術左矣顧彼之

自彼於我何加損邪弇州集成屬鄙人序幸一當刮  
目亟索鄙人集序之第覆瓿所遺荒穢不治俟病良  
已思去什七而留什三歲月坐馳一舉百廢乃今顛  
九天擗九地安得弇州聞其飾巾待期亦嘗以此快  
快惜也獻歲盡發故篋屬門人輯之無論良苦短長  
裒筴六十方在校定將授梓金陵將就僂般一引繩  
墨今之宗匠惟公擅場擬遣弟子挾筴中原待命門  
下公家封樹之役併專達之迄今凡十浹旬猶未就  
緒舍弟之病滋甚暗不能聲相彼在原我心孔棘公  
用情深厚視肉骨猶賢每言及之相嚮泣下右轄姚

君侯古之遺愛專訊有期相見幸爲先談敬謝不敏  
爰爰另狀幸懸存之

王問伯

天喪斯文哲人萎矣歲杪役夫再訊得凶問歸逝將  
匍匐婁江拊棺長慟入春則仲淹之疾滋甚幾至失  
聲醫家危之不容忽然遠出舟楫已具三筮日而未  
行儻藉寵靈弱弟小愈當決筴而往閨以爲期不佞  
幸託生歿交遺言以墓志相屬即無能爲役欣欣以  
逮事爲榮二三君子斯然衰經間義無越境子念方  
在相禮毋煩西行但得布狀或年譜成不佞即可從

事雖秋毫不敢拜命勿相加遺束芻容躬莫之不敢  
先發適中書君展墓而返附布惓惓兼謝不敏

懋成王孫

彭生亟稱海內四家闡及不佞其一楚產其三皆祇  
役楚中不佞何敢望三隅蓋三仕楚矣先鎮國疇昔  
過聽不佞幸託神交中濡有銘加灾于石顧鉅工無  
所唯讓授之貞珉天不憖遺賓我鎮國鄙人無及凶  
問竟失束芻二使將命自夏門問遺交至撫今懷昔  
悽愴久之東吳下雉二集既行不佞亦收覆瓿之餘  
付之剗剗承戶庭里社之命義不敢方稽使浹辰具

草就正同社丁元父在次遣一力弔之雲土李太史  
本寧才足張楚茲分部居汴願亟定交二草具在赫  
蹠侑臧另狀

胡元瑞

屏居幽谷足下振以跼然之音留滯市廛凡六挾日  
相與上下千古左右百家定是非攷同異挈廣狹辨  
瑕瑜知無不言言無不盡甚則儻忽之所未鑒象罔  
之所未探夫是之謂希聲夫是之謂冥合老夫億矣  
何脩而致此哉乃若命酒徵歌登歌游衍相索于形  
骸之外相從于溟滓之初庶幾物我兩忘各適其適

而已自後戶屢相及收責者急於催科幸而暑雨及時祝融避舍不佞兄弟日惟高枕函中適從酤者辱問遺即八行且重譯矣幸睹新梓吳豈越班乎計秋分毒熱未蠲榜人無敢干酷吏婁江絮酒當在八月九月之交先期計必相聞願得郭有道僊僊俱往耳士能業已拜賜未得及知酤者行色不遑報書老夫代之寄聲外有私布

古使君

君侯四十專城又十年始復故物越三年入粵進律而秩不加虔中有言即聾者將揜耳聞拂衣還蜀若

脫躡去古人亦莫不然即三聖且不免此時離黑白  
若懸寓彼多口安能爲政哉 尚方拊髀有思君侯  
行矣邇者言及不佞計從驛書聞之即不佞非鵷雛  
彼其嚇我者腐鼠耳家監將命上里不佞拜尺一于  
函中幣重辭溫何可勝感即君河東之賦就矣東觀  
方倚席待之秋與計偕御君侯而北一快事也病肺  
累月力疾操觚西望岷峨願言不盡

張督府

明公經營天府捍肩膺而衛腹心師之丈人當世無  
兩項者屬夷生心伺我瑕璽萬不得逞鼠竄而西糾

合單于深入邊境脫非先聲所薄且中近關上兵伐  
謀皆是物也 廟畧務出萬全 簡在元老禁中頗  
牧則惟明公不佞道昆故嘗從事行間聞此而喜可  
知已計今得代且以劔履趨朝相距三千里而遙材  
官將命且至辭溫幣重如鄒谷如燕臺藉令有口談  
天詎能稱謝萬一道昆家食浸久衰疾相仍瑾若昆  
蟲重聽滋甚我躬不有遑及四方昔嘗私布于大司  
馬公新督府公庶幾無他腸矣今茲復掛齒頰任耳  
者其謂之何明公猶然諄諄誨之將甚慙于長者肅  
狀申復附布爰爰北面主臣敬謝不腆惟台慈鑒納



蹇督府

仲春寓墨者方于魯書中道而阻季夏內兄子吳夷  
仲入監復作一書併上之聞歲杪始抵都門則翁已  
抵薊門居督府矣二書逗遛徒重不佞之愆西虜生  
心當宁拊髀保釐彈壓深有望于社稷臣驛聞虜  
睨三韓計今鼠竄久矣屬夷構結黠虜東西出沒無  
常薊鎮衷而折之伐謀爲上寧使爲蛇爲虺無寧爲  
率然寧使爲犬羊無寧爲狐爲虎務令機格勢禁不  
戰而屈之此則幕府之優爲惡用緩頰往以裏言私  
布翁或謂其不然頃涉群僭竟掛多口即不佞非鵠

雖也如之何嚇以腐鼠邪舊屬材官毛驥赴邊肅狀  
申白年力衰暮方將輯諸草以授梓人疇昔閱視行  
間擬作一記久而亡其籍矣獻歲將遣門徒待命門  
下經紀陳跡拾遺補亡及期當專布茲不具

王大司馬

頃西虜入聞者壽張發言盈庭株連樞筦 聖主明  
見萬里無稽勿庸乃今徒幕出邊款關請罪則廟謨  
先定伊誰當社稷功遼陽警聞計今鳥散矣頃舍弟  
以公役往附一書行歲杪始得專達屬材官毛驥入  
視其子紹介起居不佞日迫崦嵫門人方集不馴之

言而付之梓疇昔翁嘗言及之矣敬附以聞計期則來歲之秋乃可就正時方結舌不盡願言

又

頃者邊警驟聞人言競起明公皇皇夙夜几几巖廊秉之以匪躬臨之以毋貳卒之遇寇虐釋主憂蓋樽俎之勲社稷之衛也良工獨運抑孰知其苦心唯不佞臭味差同僅守少微瞻太白耳歲事更始計多福且多男屬吳仵入燕幸得通謁邊事惟大司馬在直將轂虜酋而殛之不佞越在崦嵫何敢緩頰

陳廷尉玉叔

自不佞領鄉書不入金陵者四十五年矣屏居故里  
寤寐新亭屬季兒入成均誓將挈之以往幸二三君  
子且至明公復以脩袂爲期一再申之神冉冉先馳  
矣三筮日將發會弱弟之病益深急在鵲鴿不容  
然遠出老妻舊疾亦作狼顧不遑坐是遣季子先行  
不佞逡巡未決儻俱無害則以閏初一哭元美由丹  
陽入金陵下雉上蔡二公能一留之否袂事往矣  
莫如登高栖霞牛首雨花臺燕子磯諸勝什倍龍山  
無論山陰道矣時不再至願相與圖之

張大司成

是月也適太夫人覽揆之辰蓋登大耋矣太夫人爲  
天下母是生曾子爲天下師太學固 天子饋醕之  
區萬方於是乎觀禮要以尊榮壽考夫非千載一覩  
乎哉往不佞得侍同朝幸一再聞名于梱外乃今辟  
雍伊邇無能上太夫人觴徒託無能之辭竊比東方  
生談諸王母之側相公得無讓乎請以咸池爲尊雲  
門爲俎北面堂背逋稱八千歲爲春秋太夫人幸而  
聽之猶之里社迓鼓也不腆布狀幸專達之中涓不  
佞無任主臣無任嚮往

舒大司徒

往年聞進大司空則滋喜聞徙大司徒則喜滋甚繼  
聞初度始五十既得代當入留都都人士引領望之  
幸得爲壽庭下不佞踴躍三百不知喜之無從自昔  
萬鍾之家曾不得一開口而笑乃今太公太母始偕  
老翁始艾二仲則賓興矣長君則上第矣太史矣翁  
之髮黧然黑也非所謂西方希有中國一人乎哉邑  
有劉生自言通家子也將爲效岡陵之祝就不佞徵  
辭不佞笑而謝之老夫無能爲役斯其嘉祥善事固  
當有辭無何取道歸寧三世簪纓咸在具曰天瑞豈  
惟人瑞足多舍弟道會之淮荷推愛獨至茲携季兒

入監蓋代不佞躬行路冕入金陵適與行會敬附尺  
一先達鄙私于時草創蕪辭異日仍介劉生以進季  
兒豚犬耳嗜佔畢而絕交游試事畢當紹介而見之  
聞人今則猶凜凜卻步不佞舊業悉梓之金陵計七  
月訖工尚容就正不腆另狀惟謁史麾入之

王大宗伯

不佞自楚通籍未及侍翁同朝旣得歸寧逝將白首  
翁方鴻漸九達之上海內爭覩羽儀南都藉高廟  
之靈賚秩宗而典三禮猥自託于甸服之鄙心竊竊  
然嚮往之亟欲通名無絲紹介季兒無競始學幼儀

適時政民生入學苦難預爲之援例入監困蒙未能  
受業乃從內史受孺愚夫婦逝在病鄉留侍未遣曠  
日持久茲特待命蘭臺屬舍弟道會將之行謹以竿  
牘專達犁牛舐犢姑息居多惟翁矜不能而呬詔之  
是爲衆父父也鄉國密邇利見胥期有懷未將附此  
不腆伏希鑒納

又

相公翱翔著作之庭綱紀章相之業猶之調嶰谷奏  
鈞天即有小鳴曾不足以當瓦缶頃及六君子曹命  
不佞脩辭蓋不以詹詹也者而棄小言即芻蕘庶幾



可采相公方以天地爲量齊物而無不容重以察及  
鷦鷯直將以雷聲同振郡吏將命自南宮至洋洋寔  
多譽言駢驪鏗鏘充溢耳目即虞九章韶九成無讓  
矣申之玄纁之筐貺若丘山辟易主臣徒甚慙于紹  
介白門伊邇陳謝未遑舍弟道會釋業周游猥蒙殊  
遇屬弱子芒芒歸省倉卒同行茲遣之大梁請婚取  
道馳謝頃九章有事夢卜相公留滯如初此其故非  
草莽所及知要之尚有待也不腆附布惟謁者入之

余太史

遠聞麟喪其趾鄉國莫不震驚翁親于其身當之且

重爲宗祏計因而不庭累月固無所解于其心勿藥而康則天相之也要之仁者有後業有名言子姓振振可坐而待不佞避世長往夢游不及四方或坐其有它腸三尺之喙遂文其面不佞固越王孫也即文面何傷彼之自彼吾則故吾彼計雖得吾無失也比年將携季兒入監幸得一登君子堂坐弱弟病益深不容忽然遠去曠日旣久乃屬仲嘉代行季兒跬步未出戶庭不敢遣之唐突闇者多男蓋有吉徵矣日望之弟病稍康白下之期未解閏月上旬乃可決筴翁其索我於四百八十寺中不腆藐藐幸謁史麾之

入

劉少司成

不佞越在草莽幸聞首舉公車著述論思壹稟于身心性命高跼東觀具體夔龍頃者一借臨雍若在周鎬四海九州之士莫不跂足以望宮牆即衰白餘年皇皇嚮往季兒幸籍弟子不佞將紹介而見之橋門屬弱弟病痿而深繫之甚不能去茲屬季弟道會攝行即次謹以竿牘自通季兒顓蒙曾豚犬之不若童年不習應對僅依師友而絕交游獨治博士家言旦夕不廢始至受業懼以出入分心乃今師友併在金

陵爲閉戶計挾日以往願出就舍而私肄之乞命題  
程督之舍中免其旅進秋試將復入畢試告歸乃若  
掛名作數以幸須臾非所敢望犁牛舐犢姑息居多  
竊附通家唐突私布告闈有狀不腆附將倘家弟病  
稍平尚期利見茲不具述

孫太宰

鄉也相別十七年僅一聚首都下迄今復十七年矣  
僅一紹介留都前後歲星三周曠日何久即咫尺之  
牘畢廢不脩猥云古昔石交無用苛禮竟乃半生契  
闊不已疏乎長公由北而南由少宰而太宰勲名濟

美益熾而昌嗣君骨鯁承家蓋四三世而光大之矣  
不才越在草莽聞之而喜可知中散自絕山公則其  
癖也茲遣季兒入監屬季弟道會將之行季弟昔從  
應試通名長公禮遇殊厚幸得叩闥稱謝因之專問  
起居季兒若閉犢滌中迄今未見父黨龍門峻絕詎  
敢唐突一窺季弟代申謹謝不敏丘園無以將敬布  
此芟芟伏惟鑒納

傅直指

不材猶散木也明公耳視而推轂之先是固未嘗通  
牛馬之名執羔鴈之贄受知特達誠不知其所由來

晚者或將求全慎毋以聰明累婁曠竊懼之矣既而  
匠石不顧猶幸得終其天年甚者乃復持其短長尅  
核太至不材之視榮悴直空華耳即七尺軀皆長物  
又何有於標枝明公直以卷曲而先談固自知非萬  
乘器也頃自恒山在告不遑一問起居陽烏南翔銜  
書再至導之以真諦諷之以高吟德意惓惓不啻加  
膝不材非柴中也者寧竟不報而坐忘亦惟知已貴  
相知心無事苛禮坐以不令兄弟待命醫門三歲大  
侵僅糊八口因而一切廢格甘爲名教罪人傳聞問  
法落迦願從一葦適閉關療疾跬步不前占言紫氣

西來孰爲尹喜頌之榜人東矣如此良會何聞歲首  
入朝蒼生幸甚蜀公遠北走私布裏言不材日在崦  
嵫任天之放箕裘之業付之季子鉛槧之業付之梓  
人玄同之業歸之無名菩提之業歸之無始乃今一  
無所著不知惡歟而樂生借曰不材則野火可燔斧  
斤可伐螻蟻可國鷦鷯可家此神人之所以爲大祥  
也明公爲三教主深入無生浸假當前願爲奉足不  
材越在空谷乃今亦將逃虛世之業白者紛如雌黃  
在口明公現宰官身而爲說法震動無方儻然攬轡  
而南過我方丈維摩舊疾作矣願得一當文殊報詩

二律擬書之扇頭篋中有苦無良尚須求之吳市承  
筐不腆有醜未將主臣無任

周使君國雖

姻氏方景真行三拜使命之辱其程萬里其貺百朋  
其書累數十百言其以同氣于喁殆相求于千古之  
上鄙人恹恹耳明公直以爲芻蕘也者而周詢之自  
南粵宗增城具曰盟主公家隱君子能自得師譬之  
北面猶龍龍德有在鄙人中歲學道黜聞見而反吾  
真或振之以說鈴拚耳而走既聞高義敢不伏膺昔  
龍門具良史才未必聞道仲尼弟子亦既傳之矧今



重使在門景真程督日至即支離蹇淺猶將效槃礴而擬形容信宿藁成恍然自失藉令秉彛好德小知無若大知方之龍門無能爲後固其所也左傳節文

廷

議推轂明公于時全蜀底寧恐臨邛非可安枕鄙人爲吾道計不欲以戎馬易詩書爲世道計舍此其誰也家弟病篤且深不能力疾具啓鄙人爲之專達敝草將就梓四方收責者闔門重以景真趣行不遑肅布

又

西來材木堅碩隆重密緻多文美之美者也明公賚以不朽侈于高名異日者得全要領而就之不上而得真宅矣汪丞雅出門下知使君推輓居多即老偶有二天矣承示新著鏜鏜乎振古之音送徐司馬公一篇不啻流商刻羽弁山已矣直將秉羽而入中原雲土李本寧其敵國也時方俠少爲政厭常喜新文避兩漢而趨六朝詩避正宗而趨接武一倡群和浸以成風賴二三作者力挽之猶懼勢重不可亟反百朋類鈔一叙似開駢儷而備齊梁極知大方無隅直將游戲三昧顧明公方爲時人耳目視聽于是乎取

東岷嶺在西澄清自其源始鄙人曲士日曉三隅倘  
然以謬謬見容斯文幸甚

蕭宣州

瑾居拜存問之辱迄今終不能忘此中密邇玄暉不  
遑亟問有懷嚮往苛禮何爲頃自鄭使君守宛陵褒  
然治行第一後十年而君侯至不啻過之天旂宛人  
則皆楚產即不佞無能張楚亦將附連城以自張好  
德出于秉彝非貌言也龍相君以不羈左徒往往以  
苦口藥之邇在成均能折節乎其未也比來所聞者  
猶故耳即太史公不避謬謬其如不用命何近得梅

禹金書歸德君侯殆不容口此生亦驥足也非君侯孰爲孫陽茲幸一入澤宮今且行矣適以婚姻之故專力而徼寵靈謹布狀起居具在副啓極知唐突交淺言深東面主臣

袁使君

承使將命再至敢不亟從事以逭愆期自月之上旬偶嬰霜露之疾通夕不寐精神銷亡望後二日始少平力疾具草徒取塞責夫金石之業寧詎以慢易之心入之矧在公家則雷門鼓也氣枵辭塞殊不成章第使者督促于門一日五至第恐報命濡滯將干軍

政之誅不佞屈指計之失期久矣不佞見坐無憾坐者非若而人務在徇人不敢自掩其醜伏乞斤削如非其質則擯弃之不佞竊所甘心毋傳其罪于將命者天心借寇得代者尚未有期異日者專力布之茲不具述

徐明府

不佞結髮而仕越在名邦諸先達流風猶可嚮慕既受閩事先後六年諸吏治民情猶可僂指乃今幸得聞高堂之淑問明府之英聲猶之千仞喈喈足稱希有第可望不可見即跂足何爲使命覽德輝而下之

不虞謬及不佞且登弇州之玷推而納之作者之林  
不佞碌碌人群且以衰疾廢業久矣顧其文則虎其  
質則羝進退不能觸藩何論服猛獨以通名始于一  
札莫逆有若神交重以二三君子長長尊尊得明府  
爲之宗主且以名家有世德而不佞無詭辭言遜禮  
恭不能堅謝屬收文責擁戶遂令使者稽程取辦倉  
皇極知蹇淺是不足以饜河伯海若其謂之何聞朝  
車戒行有期不遑覲縷高明亮察

周窾六

頃留使待報九日爲期薄寒中人肺病復作無以冢

孫受室猶向平未畢之勞使者三及門扉屢啟矣越旬有五曰具草苟完桂棹蓬門將甚慙于懸簿明公力廻瀾而氣蓋世鄙人僅一發之儻然無擇芻蕘比之劒首一映可也二詩聊以爲好報則未遑家弟道會字仲嘉奔佔畢而希著述茲承蹇脩之後有事大梁取道過陳方生其肺腑也儻克相遇蓋亦於陵仲子之流尚胥嗣布

又

僕家食滋久蟄如昆蟲獨二三作者振以雷聲時而晦晦時而趨趨傳聞見于耳目乃始有知于時論道

者喁喁建言者諤諤直將以孔顏爲正鵠比干爲前  
茅卽斐然有成視如敝帚豫章文獻之藪廬陵臨川  
南豐三傑並起皆大方家後歿者或以其指出先王  
而其辭不則古昔率爲秦漢左袒不登宋於齊盟近  
則義仍孟弢以博洽奇詭特著聞之舊史氏今茲應  
制卒遺夜光僕未見其人聞其語矣太康中州一部  
婁耳惡能動德輝而下鳳覽乎將命者至自陳拜詩  
書之辱僕方病視霍然而察秋毫第披若木之華竊  
懼目精奪矣僕居城府凡州里之會無所讓勞適縣  
大夫就徵數數然有事祖道且病膺作苦不啻挾辰



懼稽使程草草布狀先復尚留一介報命計近九日  
得行集序具草附之併以詩報謹謝不敏無任主臣

李明府

直指公豫戒程期履端未奉顏色承遣功曹存問疊  
疊殆數百言列之熙朝躋之名世不佞聞之汗下自  
知見笑于大方之家獻歲二三門人及不令二弟將  
收餘燼悉付梓人計入秋剗厠畢工願因就正直指  
公胥命伊邇計得郊迎歲餉先施肅此陳謝不具述

邵旌德

宛陵新都相爲脣齒君侯在旌猶在欵也直將流愷

弟而波及之不佞備在通家父母孔邇即未申介紹  
饗賜弘多令弟孝廉君惠顧函中乃廷貺命之辱重  
使專達多儀先施疊疊溫辭煦然春盎不佞何脩而  
得此也君侯課最且久旦夕將就徵車隣邑甘棠其  
標枝且蔭吾土由是而登近侍持直言豈惟社稷蒼  
生賴之即草莽老農幸得從耕鑿以終天年矣使旋  
肅此陳謝附申鄙忱

丁元父

明公入爲司直則 帝賚骨鯁之臣鄙人竊竊有喜  
心未及專達居有頃遂奔太夫人之喪鄙人備在通

家義當匍匐赴弔適聶叟不速而至挾小術而爲大言劉生極口從臾爲之一試閉關進藥禁忌百端三月啟扉不聰如故方陳辭致莫戒老蒼頭且行得仲嘉廣陵書會必躬往寧遲時日毋或倩人不虞留滯彼中近屬當阨故耳吾鄉政府不避內稱蓋與瑯琊司寇公中外推轂固知鄙人迂僻不使與聞任公子有事釣鰲即儵魚亦且見察借曰濠梁魚樂驚喜不入于心卒然加之亦將躍然而逝仲嘉以歲杪至奄忽經年獻歲將携季兒入成均且就金陵刻集屬弱弟病甚絕粒浹旬不得已仍以仲嘉代行兄弟形影

相守函中三僕明公所知長者往歲以齧主逐之茲  
將遣之入楚其二即徐文鼎其三即騶虞二豎竊取  
而入青樓再三懲之不改則以徐文鼎下郡獄騶虞  
擊雙踝累百今始平莫章成者踰年乃今始族太夫  
人墓草宿矣藉令得達已近大祥鄙人罪若丘山將  
自絕於名教仲嘉暨季兒無競竝居白下無繇具書  
安使君程高士未至新都至者惟周山人耳時方酷  
暑山人不欲久淹鄙人與之言無甚高論第江漢二  
大古壤歸于公家則天授非人力也鄙人中年病聽  
溺耳者三禪家者言空而無當藉令挈瓶而瀉業已

卷之二十三  
三  
卷舌不談詞家者言浮而不情乃今付之梓人即錮  
陳玄竄毛穎矣形家者言非荒唐則蹇淺昔徒刮目  
今則噬臍屈指而筭餘生曾不能必其信宿惡用長  
慮待河之清社稷生民有明公在幸須臾無死得及  
膏澤下流鄙人足矣明公還 闕計或及秋儻乘六  
行庶可相期于金陵之許弱弟既廢且篤復啗無聲  
如水益深茫茫彼岸季兒執業亦僅僅成章異日倘  
藉寵靈庶幾不辱明教郎君年及舞象勃然代興期  
近大婚計即吉可醮聞繼內子者爲羅孺人女弟昔  
歐陽文忠公蓋嘗身之近則元美大父司馬公尤當

其盛至明公而參也聞居室既敝假館以居獨大治  
堂皇聚徒講學程巨源自楚反其言不讐千里面談  
徒虛語耳騶虞無賴舍人第莖草而來馬食之資斧  
僅足囊中毋令徼倘來而供買笑初擬由夏門入雲  
土致尺一于徐使君今不及矣舉目舊游如相從于  
蘭臺石室有懷千百僅得緒餘薄奠專狀布之不具

### 吳太學

亡弟七年之病夙知其不可爲幸延殘喘以迄于今  
不及艾者三月耳一旦永訣謂此藐孤何不佞爲之  
治喪凡附于身者必誠必信庶幾無遺憾矣第橐中

無一長物孤癯爲可寒心不佞年力向衰愛莫能助  
承重使來唁兼賻齋糧非肺腑至親疇能及此使旋  
虔此申謝不盡願言